

perbe que de s'eleuer contre Dieu qui l'a crée, qui l'a formé & proportionné de telle façon qu'il a voulu? O impies, vous ne voulez pas croire le iour du Jugement: Il y a des Anges qui obseruent ce que vous faites, & qui sont obeissans à Dieu; Les justes iront en Paradis, & les injustes seront precipitez dedans le feu d'Enfer d'où ils ne sortiront iamais. Je ne te diray pas quand sera le iour du Jugement, ce iour personne ne pourra secourir son prochain, & Dieu seul commandera.

---

*LE CHAPITRE DE CEUX  
qui pesent à faux poids, contenant trente-six  
versets, escrit à la Meque.*

**A**V nom de Dieu clement & misericordieux. Ceux qui pesent à faux poids, & qui mesurent à fausse mesure, ne croyent pas de ressusciter au iour que tout le monde s'assemblera deuant Dieu pour estre jugé. Certainement le liure où sont escrits les pechez des meschans est gardé dedans l'Enfer. Malheur sera sur les infidelles au iour du Jugement, personne ne doute de la venuë de ce iour que les impies, lors qu'ils entendent prescher les commandemens de Dieu ils disent que ce n'est qu'une vieille fable, l'impieté les tient dans cette erreur, & les fait abandonner la loy de sa diuine Ma-

jecté, mais ils seront precipitez dedans les flammes de  
 l'Enfer. On leur dira, voila la punition que vous n'a-  
 vez pas voulu croire. Le liure où les bonnes œures  
 des gens de bien sont escrites, est gardé dedans le  
 Ciel, les Anges sont tesmoins comme les bons jouï-  
 ront des delices du Paradis, ils verront les graces im-  
 menses de Dieu, couchez sur des lits delicieux, leur  
 visage sera couuert de joye & de contentement, ils  
 beurront d'un vin purifié tres-sauoureux, qui aura l'o-  
 deur de musque, il sera cachetté dans des bouteilles  
 que personne n'ouurira qu'eux-mesmes, & sera me-  
 sé avec de l'eau de la fontaine de Paradis où boient  
 les Cherubins. Les infidelles se moquent des vray-  
 croyans qui les veulent instruire, neantmoins lors  
 qu'ils sont retournez vers leurs compagnons, ils ad-  
 mirent leur doctrine, & disent lors qu'ils les voyent,  
**VOILA LES DEVOYEZ**, mais ils ne sont pas enuoyez  
 pour estre leurs tuteurs. Les infidelles qui se conuer-  
 tiront & qui croyront au iour du Jugement, iront en  
 Paradis, ils iouiront de la grace de Dieu, ils verront  
 les rigoureux tourmens des damnez qui seront punis  
 selon leur demerites, & trouuerront en l'autre mon-  
 de ce qu'ils ont fait en terre.